



جاتن حال احوال اکار اسلام فوکانی فیع

iFIKRAH

JABATAN HAL EHWAL AGAMA ISLAM PULAU PINANG
No. Tel: 04-263 7200 • Faks: 04-250 2810 • Laman Web: <http://jaipp.penang.gov.my>

Keluaran 13, Bil: 3/2013

NATIJAH 3S – SIHIR, SAKA DAN SANTAU

سحر

Dan Syaitan

'CINA BUTA'

Sekolah Islam Antarabangsa
Pulau Pinang

القرض الحسن


Alqardhul Hassan

iFigh: Mazhab Jaafariyyah

ISSN 2180-1118



Percuma



BERKAWAN DENGAN MAZHAB JAAFARIYYAH

Soalan:

Saya berkawan dengan golongan yang mangikut mazhab Jaafariyyah, saya tidak pasti sama ada mazhab itu benar atau tidak. Adakah ia ikutan ajaran sesat dan patutkah saya meneruskan hubungan dengannya?

Jawapan:

Mazhab Jaafariyyah (Imam Dua Belas) adalah fahaman Syiah yang bercanggah dan menyeleweng daripada pegangan Ahli Sunnah Wal Jamaah dan menjadi ancaman kepada perpaduan ummah, keutuhan agama, perpaduan bangsa dan keamanan negara.

Fahaman tersebut adalah bercanggah daripada sudut aqidah, syariah dan lain-lain. Antara penyelewengan daripada sudut aqidah ialah khalifah diwasiatkan secara nas, imam adalah maksum, berpura-pura, Saidina Ali disamatarafkan dengan Allah SWT, mengkafirkan para sahabat Rasulullah SAW dan menghalalkan nikah mut'ah.

Manakala penyelewengan daripada sudut syariat pula ialah menolak ijmak ulama, menolak qias, menambah syahadah, menolak hadis yang diriwayatkan oleh Ahli Sunnah Wal Jamaah dan mengharuskan jamak sembahyang dalam semua keadaan.

Oleh itu, saudari perlulah menghindarkan diri daripada berkawan dengannya agar saudari tidak terpengaruh dengan fahaman dan amalannya. Sebaliknya, jika saudari masih terus berhubung dengannya, berazam dan berusahalah untuk membimbing dan membawa rakan saudari itu kembali ke pangkal jalan serta menghayati ajaran Islam yang sememangnya sempurna dan indah.

DIARI JHEAIPP

BIL	PROGRAM	TARIKH	TEMPAT
1.	Bengkel Keluarga Bahagia Komuniti Tahun 2013	25-26 Oktober 2013	Masjid Qaryah Sungai Ara
2.	Bengkel Pemurnian Teks Khutbah dan Tulisan Jawi Standard Tahun 2013	11-13 November 2013	The Regency Jerai Hill Resort, Gurun, Kedah
3.	Muzakarah Kepimpinan Badan-Badan Dakwah Peringkat Negeri Pulau Pinang	31 Oktober 2013	Dewan Sri Pinang
4.	Program Ijtimak Al-Huffaz & Sumbangan Kepada Para Hafiz Negeri Pulau Pinang Kali Ke-6	3 November 2013	Dewan Sri Pinang
5.	Lawatan Mahabbah Ke Rumah Perlindungan Wanita Raudhatus Sakinah	6 November 2013	Raudhatus Sakinah, Seberang Perai Selatan
6.	Majlis Konvokesyen Tadika Islam	12 November 2013	Politeknik Seberang Perai
7.	Syaranan Perdana Keindahan Islam Siri 4	13 November 2013	Politeknik Seberang Perai
8.	Majlis Anugerah Prestasi Cemerlang 2012	19 November 2013	Safira Country Club The Recreational Resort
9.	Majlis Perhimpunan Jabatan	21 November 2013	Dewan Syarahan, Masjid Negeri Pulau Pinang
10.	Konvensyen Kepimpinan & Fiqh Wanita	28 November 2013	Penang Golf Resort, Kepala Batas
11.	Kursus Pasca Perkahwinan Saudara Kita	29 November 2013 – 1 Disember 2013	Hotel Sri Malaysia, Kepala Batas
12.	Majlis Pelancaran Masjid Bebas Asap Rokok (MASBAR) Peringkat Negeri Pulau Pinang	8 Disember 2013	Masjid Abdullah Fahim, Seberang Perai Utara, Kepala Batas

Usia Manusia Singkat, Hidup Kekal Di Akhirat

Begitu pantas masa bergerak. Dari hari ke minggu, dari minggu ke bulan dan dari bulan ke tahun. Itulah putaran kehidupan di dunia. Begitu juga keadaan manusia, dari bayi ke kanak-kanak, dari kanak-kanak ke remaja, dari remaja ke dewasa dan dari dewasa ke usia tua. Manusia yang hidup di akhir zaman usianya makin singkat. Sebagaimana sabda Rasulullah SAW yang bermaksud : Umur-umur umatku antara 60 hingga 70 tahun dan sedikit sekali yang melampaui batas itu. (HR At-Tirmidzi)

Meskipun begitu kita tidak boleh lupa bahawa ajal sentiasa mengintai kita. Setelah mati, kita akan masuk ke alam kubur dan tidak tahu berapa lama kita akan berada di sana. Hanya Allah SWT yang mengetahuinya. Setelah itu, kita akan dibangkitkan dan dikumpulkan di alam Mahsyar. Satu hari di alam Mahsyar adalah bersamaan kadar tempohnya seperti 50 ribu tahun masa di dunia. Sepertimana firman Allah SWT yang bermaksud : **"Ma-laikat-malaikat dan Jibril naik (menghadap) kepada Tuhan dalam sehari yang kadarnya 50 ribu tahun."** (QS Al-Ma'arij : 4)

Kemudian kita akan dimasukkan ke alam akhirat yang kekal abadi. Isinya hanyalah syurga dan neraka. Akhirat yang kekal abadi tidak dapat dibandingkan dengan waktu yang terbatas meskipun lamanya berjuta tahun lebih daripada umur manusia yang teramat singkat. Sudah tentu kita menginginkan kehidupan bahagia di akhirat kelak, maka kita mestilah bersedia untuk menjawab persoalan yang akan ditanya oleh Allah SWT seperti sabda Rasulullah SAW yang bermaksud ; Tidak akan berganjak kaki anak Adam pada hari kiamat di hadapan ALLAH sehingga disoal tentang lima perkara; tentang umurnya, waktu mudanya dan hartanya daripada mana ia dapat dan bagaimana membelanjakannya, dan apa yang dia amalkan daripada ilmunya. (HR Ibnu Hibban & Tarmizi).

Sesungguhnya, soal jawab yang akan kita lalui itu pasti menggerunkan dan menggentarkan jiwa setiap insan kerana bukan sebarang soal jawab yang akan kita lalui. Malah, tidak dapat dibayangkan perasaan kita yang begitu kerdil ketika menghadap Allah SWT yang Maha Agong. Sudah cukupkah persediaan kita yang masih hidup di dunia ini? Namun begitu, jika kita berjaya mengharunginya, kita pasti akan merasakan kelazatan dan keindahan yang tiada bandingannya dengan kenikmatan yang terdapat di dunia ini.

Semoga kehidupan yang sekali ini membawa kita kepada kehidupan bahagia yang kekal abadi di akhirat kelak. Renung-renungkanlah!!!

Daripada
Pengarang



Sidang Redaksi

PENAUNG

YB Dato' Haji Abdul Malik Abul Kassim
Exco Hal Ehwal Agama,
Perdagangan Dalam Negeri
& Hal Ehwal Pengguna

PENASIHAT

Dato' Haji Sazali Haji Hussein
Pengarah JHEAIPP

KETUA PENGARANG

Mariah Ismail

Ketua Penolong Pengarah
Bahagian Dakwah, JHEAIPP

PENGARANG

Mohd Amin Ismail

PEMBANTU PENGARANG

Ruzaina Ibrahim

SIDANG PENGARANG

Anuar Hakim Mohd Salleh
Zulkifli Mohamed
Nor Liza Mohamad
Siti Suhaila Arsal
Muzafar Ikmal Saaid
Mohd Hayazi Mokhtar
Mohamad Zaki Abdul Halim

JURUFOTO

Aziz Md. Zain

EDARAN

Bahagian Dakwah

Sebarang pendapat dan idea,
sila salurkan melalui:
ifikrah@penang.gov.my

MUTIARA KATA

"Sesiapa yang mahu meninggalkan dunia dengan selamat, dia perlu mengamalkan perkara berikut iaitu; mengurangkan tidur, mengurangkan makan, mengurangkan bercakap dan berpada-pada dengan rezeki yang ada." (Imam Shafie)

KANDUNGAN

- 1 - Sidang Redaksi / Laman Editor / Mutiara Kata
- 2-3 - Fokus : Natijah 3S - Santau, Sihir dan Saka
- 4 - Aqidah : Mantapkan Aqidah, Perangi Syiah
- 5 - Muamalat : Al-Qardhul Hasan
- 6-7 - Undang-undang : 'Cina Buta'
- 8 - Pautan Exco : Pulau Pinang Akan Bina Sekolah Islam Antarabangsa
- 9 - Lensa iFikrah
- 10 - Institusi Madani : Masjid Daerah Barat Daya
- 11 - Terapi Keluarga Bahagia : Cemburu Tidak Bertempat
- 12 - Jejak Mithali : Harmonisasi Undang-Undang Sivil, Syariah Lebih Mudah Di Pulau Pinang
- 13 - Ringkasan Khutbah Pilihan : Dunia Bekalan Ke Akhirat
- 14 - Khidmat Mesra : Prosedur Permohonan Salinan NCR
- iFiqh... Jabatan Mufti Negeri Pulau Pinang : Berkawan Dengan Mazhab Jaafariyyah
- Diari JHEAIPP



Fokus

NATIJAH 3S - SIHIR, SAKA DAN SANTAU

Oleh: Azmah Abdullah, Bahagian Dakwah

SIHIR

Daripada segi bahasa bermaksud ikatan atau simpulan. Manakala istilah sihir menurut Al-Laits ialah suatu perbuatan yang dapat mendekatkan diri kepada syaitan dengan bantuannya.

Manakala menurut Ibnu Qudamah Al-Maqdisi, sihir ialah ikatan, jampi, perkataan yang dilontarkan secara lisan mahupun tulisan, atau melakukan sesuatu yang mempengaruhi badan, hati atau akal orang yang terkena sihir tanpa berinteraksi langsung dengannya.



Contoh

- Menggunakan jin atau syaitan melalui santau atau guna-guna.
- Mengamalkan perubatan dengan mendekatkan diri kepada jin disertai dengan penyembelihan haiwan.
- Pertunjukan silap mata menggunakan kuasa makhluk-makhluk halus.

Jenis-jenis sihir

- **Tafriq** (sihir yang memisahkan suami isteri): Akibat sihir ini timbul perasaan marah dan benci. Apabila isteri tengok suami, pada pandangannya muka suami seperti hantu, begitu juga apabila suami melihat isteri.
- **Al-Mahabbah**: Sihir ini dibuat oleh isteri kepada suami supaya suami taat, terutama jika suami kaya dan mempunyai banyak harta.

- **Takhayyul** (sihir ini menyebabkan orang yang terkena sentiasa berkhayal: Mereka yang terkena sihir ini juga sering berimajinasi benda kecil, tetapi pada pandangannya ia besar).
- **Al-Junun** (menjadi seorang yang tersangat lupa dan tersasul: Apabila orang yang terkena sihir ini bercakap, matanya terbeliak. Mereka juga tidak tetap di satu tempat dan saling bertukar kerja. Kerap dilihat merayap tanpa hala tuju dan tinggal di rumah kosong).
- **Al-Khumul**: Mereka yang terkena sihir ini lebih suka bersendirian untuk tempoh masa panjang. Mereka juga benci pada perhimpunan, sentiasa dalam keresahan dan lambat melakukan sebarang pekerjaan.
- **Al-Hawatif**: Sihir ini membuat seseorang itu mengalami mimpi ngeri, berasa diseru dalam mimpi dan mendengar suara bercakap ketika berjaga. Banyak waswas dan mereka yang terkena sihir ini banyak syak wasangka dengan orang yang rapat atau disayangi.
- **Al-Maradh** (sakit): Orang yang terkena sihir ini akan sentiasa sakit anggota badan, tubuh jadi kaku dan anggota tidak berfungsi secara tiba-tiba.



Bersambung

- **Nazif:** Sihir ini berlaku pada orang mengalami darah istihadah (darah yang keluar selepas melewati tempoh darah haid). Apabila disihir, darah akan keluar secara berterusan hingga berbulan-bulan.

- **Ta'til Dzawaj:** Sihir untuk rosakkan perkahwinan seseorang. Disebabkan sihir ini, wanita takut hendak kahwin, mudah marah, lupa dan kurang syahwat.

Punca berlaku perbuatan sihir

- Perasaan dendam seseorang terhadap orang lain
- Iri hati dengan kelebihan atau kedudukan seseorang
- Ada perasaan benci terhadap seseorang

SAKA

Maksud : Saka ialah jin yang diwarisi daripada manusia kepada manusia lain sama ada secara sedar atau tidak, kebiasaannya melibatkan keturunan.

Saka juga merujuk kepada sejenis makhluk halus, daripada golongan jin dan syaitan yang dipelihara bertujuan memelihara diri.

Bagi masyarakat Melayu, 'saka' lebih difahami sebagai jin nenek moyang yang turun daripada orang tua (datuk, nenek, bapa, bapa saudara dan lain-lain) kepada orang yang lebih muda yang ada pertalian darah dengannya (seperti anak, cucu, anak saudara dan sebagainya).

Jenis-jenis saka :

Merujuk kepada semua jenis jin dan syaitan seperti :-

- Bajang
- Toyol
- Polong
- Pelesit
- Hantu Raya
- Saka haiwan seperti harimau dan ular
- Puntianak
- Langsuir
- Penanggal
- Pocong

Cara saka diwarisi :

- Menerusi perbuatan seperti bersalaman sebagai isyarat persetujuan menerima saka.
- Menerusi lafaz seperti : "Engkaulah sahabat aku dunia dan akhirat"

SANTAU

Bahasa : Santau bermaksud tuju-tuju. Istilah : Merujuk kepada sejenis ilmu hitam yang digunakan untuk meracun musuh secara umum.

Jenis-jenis santau

- Santau makan
- Santau angin

Tanda-tanda terkena santau

- Pesakit akan berasa lenguh sendi terutama bahagian lutut dan pinggang
- Berasa tidak selesa dan sering sakit kepala
- Kurang selera makan menyebabkan badan kurus, pucat, lelah dan kurang aktif
- Kurang daya ingatan
- Berubah tabiat asal menjadi pemarah dan panas baran
- Sakit di bahagian tengkuk, kesan lelah atau asthma.

HIKMAH PENGHARAMAN SIHIR, SAKA DAN SANTAU

- Memelihara akidah muslim.
- Menghindari permusuhan dan perpecahan dalam masyarakat.
- Mengharap pertolongan Allah semata-mata.


AMALAN UNTUK MENGHINDARI PERBUATAN SIHIR, SAKA DAN SANTAU

- Membaca ayat-ayat kursi setiap kali selesai solat.
- Membaca surah al-Fatiyah, ayat kursi, surah al-Ikhlas, surah al-Falaq dan surah an-Nas setiap kali sebelum tidur.
- Sentiasa membaca al-Quran.
- Sentiasa berzikir dan menyebut nama Allah dalam setiap pekerjaan.
- Sentiasa membaca doa.

KESIMPULAN

Perlu diketahui bahawa sihir, santau dan saka merupakan perbuatan syirik dan amalan yang dimurkai Allah SWT. Syirik merupakan dosa besar dan tidak diampunkan Allah SWT. Rasulullah SAW bersabda : "Sesiapa mendatangi peramal, lalu mempercayai apa yang dikatakannya, maka solatnya tak diterima selama 40 hari." (HR Imam Muslim).

Justeru, sama-sama kita memperkasa amalan sebagai manusia yang benar-benar beriman kepada Allah SWT agar tidak terjerumus ke dalam maksiat dan perbuatan dosa yang dimurkai Allah SWT.



Aqidah

MANTAPKAN AQIDAH, JAUHI SYIAH

Oleh: Ruzaina Ibrahim, Bahagian Dakwah



Syiah?

Syiah adalah sebuah ajaran sesat yang telah muncul sejak zaman Saidina Usman bin Affan r.a. Konspirasi merosakkan agama Islam ini telah dimulakan oleh seorang Yahudi yang berasal dari Yaman bernama Abdullah bin Saba' melalui usaha mengagung-agungkan Saidina Ali r.a di samping mencerca, memaki hamun malah hingga ke tahap mengkafirkan para sahabat yang lain. Para ulamak Ahli Sunnah Wal Jamaah seperti Imam Malik, Imam Ahmad, Imam Al-Qurtubi, Imam Al-Bukhari, Imam Al-Ghazali dan ramai lagi yang mengetahui hakikat ajaran Syiah telah mengeluarkan fatwa bahawa golongan tersebut adalah kafir.

Fatwa Negeri Pulau Pinang, 1997

Ajaran dan fahaman Syiah adalah bercanggah dan menyeleweng daripada pegangan Ahli Sunnah Wal Jamaah dan menjadi ancaman kepada perpaduan ummah, keutuhan agama, perpaduan bangsa dan keamanan Negara. Fahaman dan ajaran ini perlu disekat keseluruhannya daripada berkembang di Pulau Pinang.

Aqidah?

Aqidah menurut syarak adalah beriman kepada Allah SWT, rukun-rukun Iman, rukun-rukun Islam dan perkara-perkara ghaibiyat. Ia merupakan asas kepada pembentukan ciri-ciri Islam dan pembinaan benteng yang kukuh dalam diri seseorang muslim agar tidak langsung terpengaruh dengan anasir luar yang boleh mencemarkan kesucian aqidah. Malah, seseorang muslim yang benar aqidah dan keimanannya tidak akan berasa ragu-ragu dan keberatan untuk melaksanakan perintah-perintah dan tinggalkan larangan-larangan Allah SWT serta menghidupkan sunnah-sunnah Rasulullah SAW.

Firman Allah SWT dalam Surah Al-Hujurat, ayat ke 15 yang bermaksud:

“Sesungguhnya orang-orang mukmin yang sebenarnya adalah mereka yang beriman kepada Allah dan Rasul-Nya, kemudian mereka tidak ragu-ragu, dan mereka berjihad dengan harta dan jiwanya di jalan Allah. Mereka itulah orang-orang yang benar.”

Aqidah Para Sahabat

Sangat kukuh aqidah para sahabat yang diredhai Allah SWT sehingga sanggup berkorban nyawa (syahid),

keluarga, harta dan segala jiwa raga mereka demi jihad untuk mempertahankan agama Islam. Pengorbanan keluarga Ammar bin Yasir yang diancam dengan maut yang begitu dahsyat sekali, penyeksaan terhadap Bilal bin Rabbah yang ditindih dengan batu besar di tengah-tengah padang pasir yang panas terik, penindasan terhadap golongan hamba dan golongan lemah yang memeluk Islam, peperangan demi peperangan dan banyak lagi seksaan yang dilalui oleh para sahabat dahulu. Namun begitu, keimanan mereka tidak sedikit pun goyah.

Bina Aqidah

1. Fahami Tujuan Hidup Seorang Muslim

Tujuan hidup seorang muslim adalah beribadat kepada Allah SWT semata-mata dan bukannya untuk mencari kemewahan harta, kejayaan dunia, pangkat dan lain-lain yang tidak mendatangkan manfaat pada akhirat kelak.

2. Tegakkan Al-Quran, Al-Hadis dan As-Sunnah

Cara penyelesaian yang muktabar bagi apa sahaja masalah, cabaran atau halangan yang kita hadapi adalah merujuk dan melaksanakan apa yang ditetapkan oleh Al-Quran, Al-Hadis dan As-Sunnah.

3. Mencari Ilmu Yang Sahih

Ilmu agama adalah wajib dituntut dan mestilah dipastikan kesahihannya agar sentiasa mengikut garis panduan Ahli Sunnah Wal Jamaah dan tidak terpengaruh dengan menyeleweng dari segi fahaman, ajaran dan amalan yang sesat.

4. Mengamalkan Amal-Amal Yang Soleh

Tidak cukup sekadar mencari ilmu sahaja malah ianya perlulah dijadikan amalan dalam hidup secara istiqamah agar tiada ruang untuk syaitan mengganggu gugat keimanan dan ketaqwaan terhadap Allah SWT.

5. Menjalankan Usaha Dakwah

Menyambung warisan Rasulullah SAW dan para sahabat yang berjihad dan syahid di jalan Allah untuk menyebarkan agama Islam yang sempurna supaya tidak berlaku menyeleweng oleh pihak musuh-musuh Islam terhadap mereka yang masih lemah atau jahil penguasaan agamanya di samping menggiatkan amar ma'ruf nahi munkar.

Penutup

Umat Islam mestilah sentiasa celik dan sedar akan kepentingan mengukuhkan aqidah dalam diri sendiri, anak-anak dan masyarakat di sekeliling supaya terjamin daripada penularan gerakan Syiah dan menyeleweng aqidah.

Firman Allah SWT dalam Surah Ali Imran, ayat ke 105 yang bermaksud:

“Dan janganlah kamu menyerupai orang-orang yang bercerai-berai dan berselisih sesudah datang keterangan yang jelas kepada mereka. Mereka itulah orang-orang yang mendapat seksa yang berat.”

Rujukan :

- Mengenal Hakikat Syiah – Datuk Wan Zahidi bin Wan Teh dan Syeikh Mahmood Sa'ad Nasih (Pejabat Mufti Wilayah Persekutuan) 2013
- <http://www.e-fatwa.gov.my>
- <http://www.angelfire.com>



Muamalat

AL-QARDHUL HASSAN

Oleh: Haji Mohamad Zaki Haji Abdul Halim

Al-Qardhul Hassan adalah gabungan perkataan Al-Qardh dan Al-Hassan. Perkataan Al-Qardh boleh didefinisikan sebagai potongan iaitu memotong sebilangan harta daripada harta pemberi pinjaman kepada peminjam. Al-Hassan pula ditakrifkan sebagai satu tindakan yang memberi manfaat kepada orang lain tanpa apa-apa obligasi yang diperuntukkan. Al-Qardhul Hassan dari segi bahasa boleh dijelaskan bahawa transaksi pinjaman yang berlaku hanyalah kerana mengharapkan keredhaan Allah swt.

Secara spesifikasinya, Al-Qardhul Hassan ialah aqad yang memindahkan hak milik tuan punya barang kepada pihak yang meminjam. Peminjam tersebut wajib membayar balik jumlah wang atau barang yang dipinjamkan kepadanya sama seperti yang diterimanya semasa aqad apabila sampai tempoh yang telah ditetapkan. Walaubagaimanapun, peminjam boleh mengikut budi bicaranya, membayar balik tambahan wang yang lebih banyak daripada wang yang dipinjam sebagai tanda berterima kasih. Pinjaman jenis ini tidak dikira melanggar syariah (melibatkan riba) kerana tiada perjanjian untuk membayar lebih atau riba.

Prioriti motif Al-Qardhul Hassan adalah untuk membantu golongan individu dalam kesempitan dan kemiskinan di samping mengikis penindasan sosial dan ekonomi di kalangan masyarakat. Malahan, memberi pinjaman jenis ini juga adalah salah satu daripada tuntutan Nabi Muhammad SAW dan disediakan ganjaran yang besar oleh Allah SWT kepada mereka yang meringankan beban seseorang yang mengharapkan pertolongan dari segi memenuhi keperluan dan kepentingan dharuriyah dirinya.

Hal ini adalah berdasarkan hadis Rasulullah s.a.w yang bermaksud: "Dan telah berkata Nabi Isa a.s. 'Barangsiapa menolak seorang peminta dalam keadaan kecewa, maka malaikat tidak akan memasuki rumah itu selama tujuh hari" (Imam Al Ghazali, 1995: 175).

"Telah rosak binasalah orang yang mengumpulkan harta kekayaan, kecuali orang yang membelanjakannya kepada hamba-hamba ALLAH (orang yang berhajat kepadanya) begini... dan begini... (menunjukkan kadarnya), dan orang-orang yang seumpama ini adalah sedikit sekali" (Imam Ghazali, 1978: 546).

Pemberi hutang diberikan ganjaran yang besar di sisi Islam kerana hutang di dalam Islam tidak dipinta kecuali oleh orang yang berhajat (Imam Ghazali, 1978: 762).

Rukun perlaksanaan Al-Qardhul Hassan mempunyai empat perkara yang wajib dipenuhi iaitu orang yang meminjamkan pinjaman, orang yang menerima pinjaman, objek akad yang menjadi bahan pinjaman dan sighah iaitu

lafaz ijab dan qabul antara pemberi pinjaman dan peminjam. Kesahihan perlaksanaan sesebuah akad Al-Qardhul Hassan hanya akan terjamin sekiranya akad tersebut dilakukan mengikut syarat-syarat yang telah ditetapkan syariat bagi setiap satu rukun tersebut.

Pada dasarnya, hukum memberi hutang adalah harus. Walaubagaimanapun, Islam menggalakkan umatnya agar seboleh-bolehnya menjauhkan diri daripada berhutang kerana ia boleh mendatangkan kecelaan dan kehinaan. Ini dapat digambarkan melalui hadis yang diriwayatkan oleh Imam Bukhari dan Muslim iaitu "Daripada Anas ra, daripada Rasulullah SAW di dalam doanya baginda menyebut: "Ya Allah, aku berlindung kepada-Mu dari kesusahan dan kesedihan, daripada kelemahan dan kemalasan, daripada kebaculan dan kebakhilan dan daripada beratnya hutang dan penindasan orang" (Muttafaqun 'alaih).

Rasulullah SAW pernah enggan untuk bersembahyang ke atas jenazah yang meninggal dunia sebelum menjelaskan hutang sehingga jenazah itu dijamin oleh sesiapa yang hadir untuk dibayar hutangnya. Peristiwa ini menggambarkan betapa besarnya beban dan tanggungjawab yang dipikul oleh orang yang berhutang untuk menjelaskan hutang yang ditanggung. Ini kerana hukum membayar balik hutang adalah wajib. Namun begitu, Islam sebagai agama yang sejahtera juga menggalakkan pemberi hutang agar tidak menuntut pembayaran balik hutang yang telah diberikan.

Bahkan sekiranya hutang tersebut disedekahkan terus kepada si penghutang itu adalah lebih baik. Mengenai pembayaran balik hutang ini Allah SWT berfirman dalam al-Quran yang bermaksud: "**Dan sekiranya dia (orang yang berhutang) dalam kesempitan hendaklah kamu tunggu (tangguhkan) hingga ia mempunyai kelapangan (boleh membayarnya); dan kalau kamu sedekahkan (ketinggalan hutang), itu adalah lebih baik untuk kamu, kalau kamu mengetahui**" (al-Baqarah : 280).

قرض حسن

صفر%



Undang-undang

CINA BUTA

Oleh: Mohd Hayazi Mokhtar, Bahagian Pendakwaan

Pendahuluan

Matlamat ikatan perkahwinan pasangan suami isteri adalah untuk menempuh kehidupan bersama yang berterusan hingga ke akhir hayat. Namun kadangkala timbul masalah yang menyebabkan berlakunya perceraian antara suami isteri. Perkara sebegini ada kalanya tidak dapat dielakkan dan merupakan jalan terbaik setelah segala ikhtiar gagal mencapai kejayaan.

Masalah besar yang berlaku semasa perceraian adalah talak secara ba'in bainunah kubra. Talak ba'in bainunah kubra (طلاق بائن بينونة كبرى) adalah mana-mana isteri yang diceraikan suami dengan talak tiga, sama ada dilafazkan secara berasingan atau sekaligus sebelum atau selepas berlakunya persetubuhan. Ia menyebabkan wujud suatu hukum yang mana suami tidak boleh merujuk semula bekas isterinya untuk kembali hidup bersama. Kecuali setelah bekas isteri memenuhi syarat-syarat tertentu yang ditetapkan syarak. Keadaan ini menyebabkan berlakunya nikah tahlil atau lebih dikenali di kalangan masyarakat Melayu dengan istilah "cina buta".

Cina Buta

Istilah 'cina buta' bermaksud seorang yang dijadikan perantaraan untuk berkahwin dengan bekas isteri seseorang yang diceraikan dengan talak tiga selepas habis 'iddahnya dan menyetubuhinya perempuan itu. Perkara ini berlaku untuk membolehkan bekas suami pertama perempuan tersebut berkahwin semula dengan isteri dan ia berlaku apabila isteri itu diceraikan dengan talak tiga.

Di dalam masyarakat Melayu Islam di Malaysia khususnya, istilah 'cina buta' sememangnya popular dan tidak dapat dipastikan secara jelas bagaimana istilah ini mula digunakan. Malahan, istilah ini juga popular di Indonesia. Dikatakan istilah ini bermula apabila masyarakat Melayu pada ketika dahulu mengambil jalan mudah iaitu 'menggunakan' muallaf (orang yang baru masuk Islam - biasanya orang Cina) untuk berkahwin semula dengan isteri yang diceraikan dengan talak tiga. Selepas bercerai dengan muallaf itu suami tersebut pun mengahwini bekas isterinya. Walau bagaimanapun sejauh mana kebenaran cerita ini, masih tidak dapat dipastikan.

Di dalam istilah Fiqh, nikah 'cina buta' dikenali sebagai nikah tahlil (تكح تخليل), tahlil bermaksud menghalalkan. Manakala suami pertama yang telah menceraikan isterinya dengan

talak tiga dan ingin kembali hidup bersama disebut sebagai al-Muhallil (المحتل) (yang dihalalkan kembali menikahi bekas isterinya). Suami kedua atau perantara (lebih dikenali sebagai cina buta) pula disebut sebagai al-Muhallil (المحتل) (yang menyebabkan pernikahan suami pertama dengan bekas isteri menjadi halal).

Berdasarkan ketetapan hukum syarak, apabila seseorang itu menceraikan isterinya dengan talak tiga, dia tidak boleh kembali hidup bersama dengan bekas isterinya melainkan setelah bekas isterinya berkahwin dengan orang lain. Ini berdasarkan firman Allah SWT yang bermaksudnya: **"Sesudah (diceraikan dua kali) itu, jika diceraikan pula (bagi kali yang ketiga), maka perempuan itu tidak halal lagi baginya sesudah itu sehingga ia berkahwin dengan suami yang lain. Setelah itu, kalau ia diceraikan (oleh suami baru itu dan habis eddahnya), maka mereka berdua (suami lama dan bekas isterinya) tidaklah berdosa untuk kembali (berkahwin semula), jika mereka kuat menyangka akan dapat menegakkan aturan-aturan hukum Allah. Itulah aturan hukum Allah, diterangkan kepada kaum yang mengetahui dan memahaminya."** (Al-Baqarah : 230)

Seterusnya dalam sebuah hadis: Daripada Saidatina Aishah ra: telah datang isteri Rifa'ah berjumpa Rasulullah dan berkata: "aku telah

dikahwini oleh Rifaah tetapi telah diceraikan yang tidak dapat dibatalkan (cerai talak tiga). Setelah itu aku mengahwini Abdu al-Rahman al-Zubair tetapi dia tidak mampu untuk bersama ku (lemah batin)". Kemudian rasullullah tersenyum dan berkata: "kamu mahu kembali kepada Rifa'ah. (Kamu) tidak boleh (kembali kepada rifa') sehingga kamu menikmati dia (suami kamu, Abd al-Rahman) dan dia (suami kamu) menikmati manisnya kamu (bersetubuh). Abu Bakar ra dan Khalid ibn Said berada berdekatan Rasulullah ketika itu. (HR Muslim)

Berdasarkan ayat al-Quran dan hadis di atas, ulama telah menetapkan bahawa suami hanya boleh bernikah kembali bekas isterinya itu setelah melalui lima peringkat iaitu:

- Iddah dengan suami yang menceraikannya telah selesai,
- Selepas iddah selesai, bekas isteri berkahwin dengan lelaki lain dengan akad yang sah,
- Bekas isteri hendaklah disetubuh oleh suami barunya dengan persetubuhan yang sebenar,
- Suami baru bekas isteri menceraikannya, dan



- Iddah dengan suami baru telah selesai.

Pernikahan semula antara suami tersebut dengan bekas isteri hendaklah berdasarkan persetujuan bekas isterinya serta dengan mas kahwin dan akad yang baru.

Syarat sebegini ditetapkan syarak sebagai suatu langkah mencegah suami daripada sewenang-wenangnya menceraikan isteri dengan talak tiga. Ini kerana kuasa talak terletak pada tangan suami dan seharusnya ia digunakan dengan sewajarnya.

Namun ada suami yang terlajak menceraikan isterinya dengan talak tiga telah menggunakan kaedah nikah tahlil atau 'cina buta' ini sebagai jalan untuk kembali bersama dengan bekas isterinya.

Hukum Pernikahan 'Cina Buta'

Jumhur ulama mengharamkan pernikahan seperti ini berdasarkan hadis Rasulullah SAW yang bermaksud: "Diriwayatkan daripada Ibn Mas'ud yang berkata: "Rasulullah melaknat muhallil dan muhallal lahu (bekas suami yang menyuruh orang menjadi muhallil). (HR Ahmad, Nasa'i dan Tirmizi)

Malahan sebuah athar daripada saudina Umar ra yang berkata: "Tidaklah didatangkan kepadaku Muwallil dan Muwallalnya kecuali aku merejam kedua-duanya". Kemudian anaknya menanyakan sebab hal ini, dan Umar berkata "Kedua-duanya adalah penzina". (HR Ibn Munzir, Ibn Abu Syaibah dan Abdul Razaq)

Hadis dan athar ini menunjukkan bahawa nikah tahlil atau 'cina buta' ini merupakan suatu pernikahan yang fasid dan pelakunya mendapat dosa besar dan dilaknat oleh Rasulullah SAW. Perbuatan ini seolah-olah suatu helah untuk menghalalkan suatu perbuatan yang diharamkan di sisi syarak.

Perspektif Undang-Undang

Daripada sudut undang-undang, negeri Pulau Pinang tidak menjadikan nikah tahlil sebagai suatu kesalahan jenayah



syariah. Begitu juga dengan negeri-negeri lain di Malaysia.

Namun, negeri Sabah telah menjadikan perbuatan nikah tahlil sebagai suatu kesalahan di bawah Enakmen Kesalahan Jenayah Syariah 1995. Menurut seksyen 75(1), "Muwallil iaitu sesiapa lelaki berkahwin dengan janda yang ditalak tiga sama ada melakukan persetubuhan atau tidak dengan janda yang menjadi isterinya dengan tujuan menghalalkan janda berkenaan berkahwin semula dengan bekas suami janda itu adalah melakukan suatu kesalahan dan boleh, apabila disabitkan, dikenakan hukuman denda tidak melebihi tiga ribu ringgit atau penjara selama tempoh tidak melebihi satu tahun atau kedua-duanya sekali".

Manakala seksyen 75(2) Enakmen ini pula memperuntukkan " Seseorang lelaki yang bersubahat melakukan kesalahan di bawah subseksyen (1) dengan tujuan menghalalkan perkahwinan dengan bekas isterinya adalah melakukan suatu kesalahan dan boleh, apabila disabitkan, dikenakan hukuman denda tidak melebihi tiga ribu ringgit atau penjara selama tempoh tidak melebihi satu tahun atau kedua-duanya sekali".

Kesimpulan

Sebelum melakukan suatu tindakan, seharusnya kita berfikir panjang terlebih dahulu. Hal ini kerana setiap perbuatan dan keputusan seseorang itu mempunyai kesan sama ada daripada segi hukum agama atau sudut undang-undang. Begitu juga seorang suami semasa menggunakan kuasa talaknya kepada isteri, jika terlalu mengikut perasaan amarah, tanpa disedari suami akan melafazkan talak tiga sekali gus.

Akhirnya timbul penyesalan apabila tidak dapat memenuhi beberapa syarat yang telah ditetapkan syarak untuk hidup kembali bersama bekas isteri. Justeru, mengambil jalan mudah dengan melakukan pernikahan 'cina buta' yang diharamkan oleh Islam.

Rujukan:

- Kamus Istilah Undang-Undang Keluarga Islam- Dr Zaleha Kamaruddin dan Raihanah Abdullah (Zebra Edition Sdn Bhd) 2002
- Kitab Fikah Mazhab Syafie (Fiqh Al-Manhaji) - Dr Mustafa Al-Khin, Dr Mustafa Al-Bughro dan Ali As-Syarbaji (terjemahan oleh Azizi Ismail dan Mohd Asri Hashim) (Pustaka Salam Sdn Bhd) 2002
- Fiqah Lengkap (Al-Fiqh Al-Wadhih) – Dr Muhammad Bakar Ismail (terjemahan oleh Hj M. Yusuf Sinaga MA, Hj Surendri Irandi, Hj Hasanuddin Dolah, Hj Muhammad Zuhirsyan dan Hj Abdul Rahman Salleh) (Jasmin Enterprise) 2008
- Enakmen Kesalahan Jenayah Syariah (Negeri Pulau Pinang) 2004
- Enakmen Kesalahan Jenayah Syariah Negeri Sabah 1995
- Portal Rasmi E-Syariah



PULAU PINANG AKAN BINA SEKOLAH ISLAM ANTARABANGSA

Oleh: Zulkifli Mohamed, Pegawai Khas Exco Agama



Satu-satunya Sekolah Islam bertaraf antarabangsa di kawasan utara Semenanjung akan mulai dibina di Pulau Pinang pada tahun hadapan yang dijangka siap dalam tempoh dua tahun. Projek tersebut sebahagian usaha kerajaan negeri untuk meningkatkan mutu pendidikan Islam di Pulau Pinang sekaligus meninggikan syiar Islam di negeri ini.

Yayasan Islam Pulau Pinang (YIPP) iaitu sebuah badan di bawah kerajaan negeri, dengan kerjasama Koperasi Tunas Muda Sungai Ara Berhad, akan membina sekolah tersebut di atas Lot PT260, Mukim 10 Daerah Barat Daya, Pulau Pinang, dengan kos dianggarkan bernilai RM6 juta. Tanah seluas 4.863 ekar (19,681.70 meter persegi) terletak di Jalan

Persiaran Relau berhampiran Sekolah Kebangsaan Relau, Sungai Ara.

Majlis penyerahan hak milik tanah berlangsung 16 Oktober lalu dihadiri Ketua Menteri Lim Guan Eng, Timbalan Ketua Menteri 1, Dato' Rasyid Hasnon, Exco Hal Ehwal Agama Dato' Abdul Malik Kassim dan Pengerusi YIPP Dato' Mansor Othman yang juga Ahli Parlimen Nibong Tebal.

Sekolah Islam Antarabangsa tersebut akan dilengkapi dengan blok pentadbiran akademik, dewan serbaguna, kompleks sukan dan asrama pelajar. Ia akan menjadi mercu tanda baru Pulau Pinang.





TYT Tun Dato' Seri Utama Haji Abdul Rahman Haji Abbas, Yang di-Pertua Negeri Pulau Pinang telah menyampaikan hadiah kepada Tokoh Maal Hijrah 1435, Profesor Datuk Syed Omar Syed Mohamad sempena Maal Hijrah 1435



Sebahagian daripada peserta al-hafiz yang menyertai Majlis Ijtimak Al-Huffaz Negeri Pulau Pinang yang diadakan pada 3.11.2013 di Dewan Sri Pinang, Pulau Pinang



Tokoh Al-Hafiz 2013, Ustaz Hanif Azmir Hassim sedang menerima hadiah daripada TYT Tun Dato' Seri Utama Haji Abdul Rahman Haji Abbas, Yang di-Pertua Negeri Pulau Pinang pada Majlis Ijtimak Al-Huffaz 2013 di Dewan Sri Pinang, Pulau Pinang pada 3.11.2013



Antara dif kehormat yang menghadiri Majlis Perhimpunan Ummah Sempena Sambutan Maal Hijrah 1435 di Dewan Mutiara Politeknik Permatang Pauh, Senerang Perai.




TYT Tun Dato' Seri Utama Haji Abdul Rahman Haji Abbas, Yang di-Pertua Negeri Pulau Pinang telah menyampaikan anugerah Pendakwah Negeri 1435 kepada Dato' Siti Nor Bahyah Mahamood pada sambutan Maal Hijrah 1435 Peringkat Negeri Pulau Pinang



Institusia Madani

MASJID DAERAH BARAT DAYA

Oleh: Bahagian Pengurusan Masjid Surau



Tapak asal Masjid Daerah Barat Daya, Balik Pulau yang telah siap dibina pada tahun 2003 merupakan kawasan hutan paya. Pada 19 Mac 2004M bersamaan 27 Muharam 1425H, majlis perasmian masjid telah disempurnakan oleh TYT Tun Dato' Seri Utama Dr. Haji Abdul Rahman bin Haji Abbas, Yang di-Pertua Negeri Pulau Pinang. Masjid ini terletak bersebelahan Perpustakaan Balik Pulau dan Ibu Pejabat Polis Daerah.

Pada peringkat awal, masjid ini tidak mempunyai sempadan anak qaryah. Maka pada tahun 2012 Pejabat Agama Daerah Barat Daya dengan kerjasama Pengerusi Masjid Jamek Paya Kongsi dan Masjid Jamek Kampung Paya telah membuat bincian anak qaryah bagi persempadanan semula. Pada 27 Julai 2012, secara rasminya masjid ini mempunyai anak qaryah setelah Jabatan Mufti Negeri Pulau Pinang membuat ketetapan anak qaryah untuk Masjid Daerah Barat Daya.

Masjid Daerah Barat Daya, Balik Pulau berkonsepkan gabungan reka bentuk binaan Timur Tengah dan reka bentuk binaan moden yang amat unik dan berkualiti tinggi. Ia turut dilengkapi dengan kemudahan asas terkini yang memberi kepuasan kepada para pengunjung tidak kira sama ada muslimin maupun muslimat.

Kemudahan

- Ruang Solat berhawa dingin yang memuatkan jemaah seramai 3,500 orang.
- Dewan Seminar
- Bilik Seminar
- Bilik Musafir
- Taman Permainan Kanak-kanak
- Wifi Percuma & Tempat Wakaf Istirehat
- Gerai Makanan & Minuman
- Pakir Kereta yang luas dan selesa

Khidmat & Aktiviti

- i) Pengimaranan Masjid :
 - Kuliah & Kursus
 - Qiamulail & Bacaan Kitab
 - Kem Solat & Pratahfiz
 - Karnival & Bazar Ramadhan
 - Sambutan Hari Kebesaran Islam.
 - ii) Program Kemasyarakatan :
 - Sumbangan kepada Anak Yatim
 - Sumbangan Daging Qurban
 - Sumbangan Aidilfitri & Aidiladha
 - Kursus Praperkahwinan
 - Kelas Tusyen
 - Kelas Seni Bela Diri
 - Kelab Remaja Masjid
 - Gotong Royong Perdana
- ### Senarai Pegawai Masjid
- **IMAM UTAMA** - Ustaz Che Amer Bin Mehad
 - **TIMBALAN IMAM** - Ustaz Mohd Nizam Bin Ibrahim
 - **PEMBANTU IMAM** - Ustaz Mohd Hafiz Bin Mohd Salleh dan Ustaz Meor Iqmal Bin Mohamad
 - **PEMBANTU AM** - Mohd Shahimi Bin Hamzah
 - **IMAM RAWATIB** - Ustaz Aznan Bin Ahmad, Ustaz Sab'oun Masani Bin Zaini, Ustaz Mohamad Huzaifah dan Ustaz Rashdan Sulhi Bin Mohd Latzfi
 - **BILAL RAWATIB** - Ustaz Abdullah Bin Abdul Aziz dan Tuan Haji Sanusi Bin Kidi
 - **NOJA** - Haji Abd Rahman Bin Abdullah dan Haji Haron Bin Hashim



Terapi Keluarga Bahagia

CEMBURU TIDAK BERTEMPAT

Oleh: Siti Suhaila Arshad, Bahagian Undang-undang Keluarga Islam

Sifat cemburu adalah fitrah bagi setiap manusia yang berperasaan kerana ia lahir daripada perasaan ambil berat seseorang terhadap seseorang. Sinonimnya cemburu itu dikaitkan dengan wanita. Mungkin kerana wanita itu sifatnya lebih penyayang berbanding lelaki serta bertepatan juga dengan pandangan ramai yang menyatakan cemburu itu tandanya sayang. Namun, sejauh manakah perasaan cemburu yang ada pada seseorang boleh menambahkan kasih sayang pasangan terhadap pasangannya kerana ada juga cemburu yang boleh mengundang duka dan menjadikan seseorang merana.

Cemburu... Disukai atau Dibenci

Ada pasangan yang suka melihat sesekali pasangannya cemburu kerana menganggap itu tanda sayang. Namun begitu, perasaan cemburu yang ditimbulkan pasangan boleh juga mengundang rasa benci oleh pasangannya. Bahkan Nabi SAW pernah bersabda berkaitan cemburu yang disukai dan dibenci sebagaimana hadis yang diriwayatkan oleh Jabir bin Atiik al-Anshaari yang bermaksud: "Ada cemburu yang disukai oleh Allah, dan ada pula yang dibenciNya. Cemburu yang disukai oleh Allah SWT adalah cemburu kerana sesuatu yang haram, sedang cemburu yang dibenci oleh Allah adalah cemburu bukan kerana sesuatu yang haram."

Cemburu yang disukai adalah merupakan fitrah manusia iaitu yang dapat menjaga dan melindungi keluarga daripada perkara-perkara yang keji dan mungkar serta tidak melampaui batas. Cemburu seperti ini disukai kerana dianggap berakhlik mulia serta patut dimiliki oleh setiap mukmin.

Cemburu yang dibenci adalah cemburu yang melampaui batas sehingga mendorong seseorang cenderung untuk mencurigai pasangannya dari segenap aspek seperti curiga apabila pasangan terpandang atau bercakap dengan wanita atau lelaki, pasangan berbual melalui telefon dengan nada yang perlahan, pasangan melayari internet dan sebagainya. Perasaan curiga dan prasangka buruk akan timbul walaupun pasangan tersebut tidak menunjukkan tanda-tanda curang sebagaimana kisah ini.

Kisah Benar

" Lia (bukan nama sebenar) marah kepada suaminya, Din (bukan nama sebenar) apabila diberitahu bahawa dia telah membuka akaun facebook. Lia merasa tidak selesa dengan makluman Din kepadanya dan menyangka suaminya ada wanita lain kerana berdasarkan cerita-cerita yang didengari oleh Lia daripada rakan-rakannya, bahawa suami mereka banyak mempunyai kekasih gelap melalui alam siber terutama facebook. Disebabkan perasaan curiga dan prasangka yang tidak dapat dikawal, Lia berkali-kali meminta Din menceraikannya. Bagi meyakinkan Lia bahawa Din tiada kekasih gelap di alam siber, maka Din bersetuju (melalui sesi kaunseling) agar isterinya, Lia berkongsi akaun facebook dengan dia bagi membuang prasangka Lia tersebut. Setelah tindakan tersebut diambil, barulah Lia mengetahui keadaan sebenar dan mengakui bahawa dirinya terlalu berprasangka kepada suaminya, Din disebabkan terpengaruh dengan cerita rakan-rakannya. Lia akhirnya mengakui bahawa suaminya seorang yang sangat bertanggung jawab tetapi dirinya terlalu cemburu dan mengikut emosi."

Kesan Cemburu

Individu yang obses dengan cemburu seperti cerita Lia boleh

merosakkan dirinya termasuk hubungannya dengan pasangannya malah orang sekeliling. Bentuk cemburu yang merosakkan berpunca daripada rasa rendah penghargaan diri dan rasa tidak selamat. Ada pandangan menyatakan bahawa cemburu itu boleh mendorong kepada seseorang mengalami masalah kesihatan mental seperti kebimbangan (anxiety), gangguan tidur dan sebagainya.

Sifat cemburu yang melampau akan menyebabkan pasangan rasa tidak selesa dan merasakan dirinya serta kesetiaannya tidak dihargai dan tiada nilai. Apabila sifat ini beraja di hati, maka kesudahannya boleh mengundang perpecahan dalam rumah tangga. Sebaliknya, cemburu yang disukai boleh membawa kepada sesuatu yang positif di mana boleh menjaga dan mengeratkan hubungan sesama pasangan. Ia juga boleh mengingatkan kepada pasangannya agar tidak melakukan perkara yang ditegah oleh Islam.

Terapi Cemburu

Masalah Lia dan Din boleh dijadikan iktibar dalam rumah tangga. Setiap manusia tidak dapat lari daripada perasaan cemburu kerana itu adalah fitrah semulajadi manusia. Namun begitu, ia bergantung kepada kita bagaimana untuk mengawalnya agar tidak membiarkan emosi mengawal diri. Sehubungan itu, ilmu perlu sentiasa dicari agar diri dan rumah tangga harmoni.

Antara cara yang boleh membantu seseorang untuk mengawal cemburu adalah dengan menggunakan dua nikmat pancaindera yang Allah telah anugerahkan kepada setiap manusia dengan sebaiknya iaitu:

- **Akal** – Allah kurniakan akal untuk manusia memikirkan tentang kebesaranNya dan digunakan untuk membangunkan umat manusia ke arah mencapai keredhaaNnya. Oleh itu, rasionalkan pemikiran dengan perkara-perkara yang positif dan nilai terlebih dahulu anasir-anasir negatif yang datang dengan bersangka baik tanpa mengambil tindakan melulu.
- **Hati** – Firman Allah swt dalam surah, Ar-Ra'd: Ayat 28 yang bermaksud: "Hanya dengan mengingati Allah sahaja hati-hati menjadi tenang tenteram." Perbanyakkanlah berzikir dan membaca Al-Quran agar hati sentiasa berada bersamaNya serta dapat berlindung daripada gangguan syaitan yang suka melihat rumah tangga binasa.

Kesimpulannya, melalui pemikiran yang positif, secara tidak langsung emosi turut dapat dikawal. Justeru, terpulang kepada manusia untuk memilih jalan bagaimana untuk mengawal rasa cemburu yang hadir dalam diri. Janganlah sesekali kita melampaui batas dalam bersifat cemburu kerana Islam juga menggalakkan kita agar bersederhana dalam setiap perkara.

Jejak Mithali

Harmonisasi Undang-Undang Sivil, Syariah Lebih Mudah Di Pulau Pinang

Oleh: Zulkifli Mohamed, Pegawai Khas Exco Agama

Sebagai penegak kebenaran dan keadilan, Khalifah Umar Abdul Aziz bersikap cermat dan teliti ketika memilih para penegak hukum agar seluruh rakyatnya tidak menjadi mangsa kezaliman. Beliau menetapkan hakim perlu memenuhi lima syarat yang ditetapkan, iaitu berilmu luas, santun, suci hati, seorang ‘konsultan’ yang teguh dan konsisten dalam menegak kebenaran. Khalifah Umar juga melalui banyak ranjau dan cabaran dalam menegakkan prinsip kebenaran dan keadilan melalui undang-undang syariah.

Di Malaysia, sistem perundangan lebih mencabar. Ia unik kerana mempunyai sistem dwi perundangan, iaitu sivil dan syariah hingga kerap kali membawa kepada konflik perundangan di antara kedua-duanya. Pulau Pinang juga tidak terkecuali, lebih-lebih lagi kerajaan negeri giat memartabatkan Islam di negeri ini sebagaimana dijamin dalam Perlembagaan Persekutuan.

Bagaimanapun, Ketua Hakim Mahkamah Syarie Pulau Pinang, YAA Dato' Abdul Walid Abu Hassan berpendapat perbezaan yang terdapat dalam amalan perundangan Mahkamah Sivil dan Mahkamah Syariah sepatutnya tidak ditajamkan. Sebaliknya, beliau berkata, undang-undang sivil dan syariah itu perlu terus diharmonikan secara beransur-ansur dan cermat.

Bercakap kepada media, Abdul Walid berkata undang-undang sivil kebanyakannya hampir kepada syariah Islam, cuma ianya tidak dipanggil syariah Islam sahaja.

“Berdasarkan kajian saya pada Kanun Keseksaan 302, (Seksyen) 304, Akta Kontrak, Akta Sewa Beli dan banyak lagi undang-undang sivil yang sedia ada, kebanyakannya mendekati syariah Islam. Apa yang terdapat dalam Kanun Jenayah Syariah, itu juga diambil daripada Undang-Undang Sivil, cuma dimansuhkan beberapa perkara melalui Jawatankuasa Teknikal Undang-Undang Syarak Sivil, seperti tahanan tanpa bicara tidak diamalkan di Mahkamah Syariah.

“Sebab itu, usaha untuk mengharmonisasikan undang-undang syariah dalam kerangka undang-undang sivil adalah diperlukan,” tegasnya.

Jelas Abdul Walid, proses untuk melaksanakan syariah Islamiyah sepatutnya dilakukan secara beransur-ansur, bersesuaian dengan kondisi, masa, dan tempat.

“Dalam konteks Pulau Pinang, umpamanya, pelaksanaan amar makruf (menyuruh kebaikan) dan nahi mungkar (mencegah kemungkaran) memang sedia dilakukan sendiri oleh sebuah kerajaan (melalui) mahkamah, polis dan agensi-agensi kerajaan yang lain,” jelasnya.

“Undang-undang di Mahkamah Syariah hampir lengkap. Wujudnya pertikaian bahawa mengapa tidak dilaksanakan hukuman hudud. Saya menjawab bahawa itu antara sebahagian kecil yang tidak dilaksanakan. Ada juga dimomokkan bahawa jika tidak melaksanakan hukuman hudud maka Negara ini bukan negara Islam. Bagi saya, masih banyak ruang amal Islami yang perlu dilaksanakan, antaranya usaha mengharmonisasi semangat syariah Islamiah ini dalam perundangan sivil,” ujar beliau.

“Amal Islami seperti dakwah Islamiah, pendidikan Islam, kehakiman syariah, memerangi jenayah, kesemuanya boleh dilakukan dalam ruang lingkup undang-undang sivil dan syariah yang sedia ada sekarang. Justeru, kita (umat Islam) perlu meneroka dinamika undang-undang sivil dan syariah yang sedia ada. Kita tidak perlu tunggu dan mengharap hukuman Hudud dilaksanakan, barulah kita mengiktiraf bahawa negara ini ialah Negara Islam,” tegasnya.

Penjelasan Abdul Walid itu dilihat mendekati kaedah fiqh yang berbunyi al-hukmu yadru ma ‘ala musamma la ‘ala Islami yang bermaksud, penghukuman itu berlegar pada perkara yang diberikan nama, bukannya jenama).



Dato' Abdul Malik bersama YAA Dato' Abdul Walid (duduk 3 dari kiri)
bersama kakitangam Mahkamah Rendah Syariah



Ringkasan Khutbah Pilihan

DUNIA BEKALAN KE AKHIRAT

Oleh: Ruzaina Ibrahim, Bahagian Dakwah

Kehidupan seorang muslim mestilah menuju ke arah jalan yang benar dan diredhai oleh Allah SWT dengan berpandukan Al-Quran dan As-Sunnah. Firman Allah SWT dalam Surah 'Ali-Imran, ayat 133 yang bermaksud "*Dan bersegeralah kamu mencari keampunan dari Tuhanmu dan mendapat syurga yang luasnya seluas langit dan bumi yang disediakan bagi orang-orang yang bertaqwa.*" Berdasarkan ayat ini, dapat difahami bahawa keampunan daripada Allah SWT dan amalan-amalan soleh adalah landasan yang akan membawa kita dengan selamat ke destinasi sebenar bernama akhirat.

Al-Quranul Karim jelas menggambarkan keadaan dan perasaan cemas, takut serta merana yang akan timbul di kalangan umat yang melakukan dosa tatkala buku catatan amalan mereka dibentangkan di padang Mahsyar kelak. Kita harus sedar bahawa setiap perkara yang dilakukan di muka bumi ini sentiasa dicatat oleh malaikat Allah SWT dan akan diadili di akhirat nanti, walaupun ia sekecil zarah seperti mana firman Allah SWT dalam surah Al-Infirar, ayat 10 dan 11 yang bermaksud "*Dan sesungguhnya bagi kamu ada malaikat-malaikat yang mengawasi (pekerjaanmu), yang mulia (di sisi Allah SWT) dan yang mencatat (perbuatanmu).*"

Persoalannya???

Adakah kita bersyukur terhadap nikmat-nikmat yang dikurniakan Allah SWT? Adakah kita sedar bahawa kehidupan di dunia ini hanyalah kehidupan yang sementara dan akhirat adalah kekal abadi? Adakah kita bersedia manghadapi maut yang akan datang secara tiba-tiba? Betapa untungnya kita yang bergelar umat Nabi Muhammad SAW jika amat tinggi sekali kerisauan dan keinginan kita dalam membawa

kehidupan Islam yang sebenar dalam diri kita dan masyarakat sekeliling. Sebaliknya, demi mengejar kemewahan dunia, kita sanggup abaikan solat, puasa, zakat, menunaikan haji, sunnah-sunnah Nabi SAW, batasan-batasan syariat, hak-hak sesama manusia, malah ada di kalangan kita yang sanggup menzalimi antara satu sama lain. Tidak gentarkah hati kita untuk melakukan perkara-perkara sedemikian yang kelak kita pasti akan menemui Allah SWT yang Maha Perkasa lagi Maha Bijaksana.

Orang Yang Muflis

Sabda Rasulullah SAW yang bermaksud, "Tahukah kamu siapakah orang yang muflis? Para sahabat menjawab: Bagi kami orang yang muflis ialah orang yang tidak memiliki wang maupun harta benda. Lalu Rasulullah SAW bersabda lagi: Sebenarnya orang yang muflis di kalangan umatku ialah mereka yang pada hari kiamat datang membawa pahala amal solat, puasa, zakat dan haji tetapi semasa di dunia mereka pernah mencaci maki orang,

menuduh tanpa bukti, memakan harta dengan zalim, membunuh dan memukul sesuka hati. Lalu pada hari kiamat, orang yang dizalimi akan menerima pahala amal si penzalim. Jika pahala amalannya telah habis diberikan sedangkan kesalahan dan dosanya semasa di dunia kepada orang yang tidak berdosa masih banyak, maka Allah SWT akan memberi pula dosa orang yang dizalimi itu kepadanya sehingga semakin berat bebannya, lalu Allah SWT mencampakkannya ke dalam neraka." (HR Muslim)


Peringatan Mesra

- Kita perlu berlumba-lumba dalam melakukan ibadat dan amalan kebaikan dengan niat ikhlas hanya kerana Allah SWT;
- Kita mesti bersyukur atas segala nikmat kurniaan Allah SWT dengan menggunakan rezeki yang diberikan ke jalan yang diredhai Allah SWT;
- Kita jangan sesekali menzalimi dan menyakiti orang lain kerana ia boleh menyebabkan kita menjadi orang

yang muflis di akhirat kelak. Na'uzubillah;

- Kita sebagai seorang muslim perlu melaksanakan amar ma'ruf nahi munkar (menyeru kepada kebaikan dan mencegah kemungkaran) agar tercapai tujuan hidup sempurna.

Marilah bersama-sama kita bermuhasabah diri dan berusaha agar kita berkelayakan untuk bergelar 'khaira ummah', InsyaAllah.





Khidmat Mesra

PROSEDUR PERMOHONAN SALINAN SURAT PERAKUAN NIKAH/CERAI/RUJU'

Oleh: Bahagian Undang-undang Keluarga Islam

1. Mengisi **Borang 18** yang disediakan oleh Bahagian Undang-Undang Keluarga. Borang tersebut adalah percuma dan boleh diperolehi di Jabatan Hal Ehwal Agama Islam Pulau Pinang dan Pejabat Agama Daerah atau boleh dimuat turun melalui laman web; <http://jaipp.penang.gov.my>

2. Borang yang lengkap diisi hendaklah dikemukakan kepada Bahagian Undang-Undang Keluarga Islam (JHEAIPP) atau Pejabat Agama Daerah.

Syarat-syarat :

- Bagi permohonan untuk mendapatkan salinan Surat Perakuan Cerai, pemohon perlu mengemukakan SURAT AKUAN SUMPAH dengan menyatakan tujuan salinan tersebut dipohon.
- Bagi wakil yang datang untuk mendapatkan salinan/ cabutan surat perakuan nikah/ cerai/ ruju' perlu mengemukakan surat kuasa/surat sokongan yang ditandatangani oleh pemilik yang tertera dalam dokumen NCR tersebut. Sekiranya suami/isteri telah meninggal dunia, waris mereka (saudara kandung) boleh menandatangani surat kuasa tersebut.
- Bagi salinan dokumen pasangan yang telah meninggal dunia, pemohonan boleh dibuat oleh waris atau mana-mana pihak dengan mengemukakan dokumen sokongan yang menunjukkan keperluan kepada salinan perakuan NCR tersebut dikeluarkan.

3. Pemohon boleh menuntut salinan surat nikah/cerai/ruju' di Jabatan Hal Ehwal Agama Islam Pualu Pinang atau Pejabat Agama Daerah selepas tempoh tujuh [7] hari setelah permohonan lengkap diterima dan bayaran sebanyak RM10.00 dijelaskan.

PERHATIAN:

- Sila pastikan pemohon mendapat slip tuntutan dokumen sebelum meninggalkan kaunter.
- Pemohon hendaklah menghubungi Bahagian Undang-Undang Keluarga Islam, JHEAIPP atau Pejabat Agama Daerah (mengikut tempat permohonan dibuat) terlebih dahulu untuk mengetahui status pengeluaran salinan dokumen tersebut.
- Pengeluaran salinan dokumen adalah tertakluk kepada kelancaran sistem online.

